

## Pelgrimstocht



Wie haarn ons aigen pelgrimsoord. n Stee waar ooit n dörpke legen haar. Doar waar de nije begroafploats ainmoal was zöchten wie naar ons verleden. Dat stee tussen de bomen en stroeken, waar de groaven al laank weghoald waarn, waar reeën en knienen heur thoes haarn en de buizerd zien nust mouk maank t roegte, dat was ons stee om te overdenken, ons pelgrimsoord.

1 december bin ik vernijs op pelgrimstocht west. In t baalkeduuster mit n zaklaamp en n koptelefoon op ging t laangs diek van Ziel naar kerk van Termunten waar de klokken ons van vèrn al n welkom touraipen.

Onderweg vertelde n stem ons oet biebel en wat der aal in wereld gebeurd was. Veul infor-moatsie, verwarring soms deurdat er ook kinderstemmen tussendeur klonken. Of was dat de bedoulen, ons te verwassen om ons zodounde noa te loaten denken in dij stille oavend mit enkelt n paar steerns hoog in lucht en op högte de verlichte kerk van Termunten.



Ons pelgrimstocht naar Termunten. Zullen monneken zo ook bie pad wèst hemm vrouger. In t baalkeduuster, langs onverharde poaden zunder stroatlanteerns? Ik kin mie t nait veur-stellen. Ze hemm veurvast wacht op n wolkenloze oavend mit helder moan om op stap te goan. En allinne as de noodzoak der was mit schienvat en staf op pad te goan naar n zaike of staarvende.

In kerk van Termunten wern we verwelkomd mit brood, wien en örgelklanken en konn wie ons deelzetteten op de roodflewainen kuzzens op kerkbaank om te luustern naar t verhalo wat ons verteld wôr deur n soort predeker. Verhalo over verleden, heden en toekomst van hai haar al hail laank op wereld west, knecht van n riek heer dij hom op pelgrimstocht stuurde. Ze haarn stief geld verdaind mit verkoop van ófloaten dij minsen heur gewaiten schoonvegen mozzen. Aan zundoars gain gebrek. En dood wol mor nait komm.

Hai belandde in t joar 2031 waar e in geut tot zug kwam maank stoapels plestieken vledden en elk en ain laip hom veurbie mit gezichten zunder oetdrukken asof ze apmoal volspoten waarn mit Botox. Dou kwam der n vraauw mit n gesloagen gezicht dij zug om hom bekummerde. En hai vroug zug of, terug in ons tied, of der nait overaal onder ons zo'n vraauw was mit n gesloagen gezicht dij aan n vremde hulp bood. Zo tegen t ende kwam der n engel hom vertellen dat e goan mog en hai vlijt zug deel en engel slot zien ogen. Veur altied pelgrim haar zien rust vonden. Schaande dat we engel nait beter verstoan konn. Mor allain klank van heur stem rouk ons haart al.



Noa dizze biezundere veurstellen van predeker, n akteur, zoas e zug nuimde, ging we laangs diek en deur regen weerom naar Ziel, overdenkend wat ons verteld was. Steerns haarn zug verscholen achter wolken. En zoas t in tied van monneken wellicht ook goan was, wer der onderwegens n herberg aandoan veurdat dizze aigentiedse pelgrims heur tocht volbrochten naar parkeerploats om doar n gift te doun en nait om heur gewaiten schoon te vegen (of toch). En Stichten Peerd deur tied te helpen.

Ultreya e Suseya ( Westwaarts en Houd vol!)

Mieke, Termunterziel, dezember 2011